



UKA 2016/7-2

Randi Vestergaard Evaldsen

15. november 2016

2017-mut aningaasanut inatsisissatut siunnersuut.

(Aningaasaqarnermut Akileraartarnermullu Naalakkersuisoq)

(Aappassaaneerpera)

Unneqqarillunga nassuerutigissavara ullumi oqaluttarfimmiinnera misigussitsikkut eqqumiikujummat. 2017-mut Aningaasanut Inatsisissap imai pingaernerit tamanut ssaqqummiuppakka aggustimi tusagassiortunik katersortitsinitsinni. Aammalu Aningaasanut Inatsisissatut siunnersuut siullermeerneqassammat Inatsisartunut saqqummiussimallugu septembarimi – oqarusuppungalu tanngassimaarutigeqigakku nuannaarutigalugulu imarisai saqqummiunneqarneraniik taamak amerlatigisut ilanngunneqaqqissimmamata paariinneqarlutillu.

Naalakkersuisooqatigiit nikinnerisa kinguneranik Aningaasaqarnermut Naalakkersuisunngortup 2017-mut Aningaasanut Inatsisissaq inaarnissaa akisussaaffigilerpaa. Aningaasanut inatsit aningaasaqarnikkut akisussaassuseqassaaq aammalu Inatsartuni partiinit sapinngisamik tamanit akuerineqarsinnaasariaqassaaq.

Suliaq imaannaanngitsuvoq. Aningaasaqarnermut Akileraartarnermullu Naalakkersuisup ilisimassavaa Demokraatiniit annertuumik akisussaaqataaffigerusukkatsigu sapinngisamik amerlanerpaat aningaasanut inatsimmut akuerseqataanissaat, nunatsinni aningaasaqarneq sapinngisamik patajaannerpaaqqullugu. Akisussaaqataavugut.

Pingaarnertut Demokraatiniit iluarisimaarparput, akisussaassuseqartumik aningaasatigut ingerlatsinissaq uagut toqqammaviligarput maannamut Naalakkersuisunngortuniit nanginneqarsimammat. Tamanna tunngavigalugu Aningaasanut Inatsisissamut siunnersuut suli



tapersorsorparput, taamaattorli nakkutigeeqqissaarumaarparput aappassaaneernerani pingajussaaneerneranilu allannguisoqassanersoq susoqassanersorlu, qularnaarumallugu, aningaasanut inatsisissap inernera aningaasaqarnikkut akisussaassuseqarnissaa.

Inatsisartut inersuaani politikerit suli amerlavallaarujussuarput aalajangiiffigisassanik siunnersuuteqartartut aningaasanik atuinissamik kinguneqartitsisartunik. Aamma amerlavallarput suli Aningaasanut Inatsisissamut piumasaqaateqartartut nunatta aningaasaqarnera ilungersunareertigisoq aamma aningaasanik atuinissamut kissaateqartartut. Demokraatiniit neriuutigaarput Aningaasaqarnermut Akileraartarnermullu Naalakkersuisoq nukittussasoq, tatineqarsinnaassanngitsorlu. Allatut ajornarluinnartumik sakkortuumik pingaarnersiuisariaqarpugut aningaasarsiornikkut atukkagut pissutsillu pissutigalugit.

2015-mi ineriartorneq annertunngilaq. Aningaasaqarnermut siunnersuisooqatigiit siulittuutigaat 2016-mi aningaasarsiorneq 5 procentit missaani siuariumaartoq. Tamanna nuannaarutissaavoq! Isumaqaanngilaq aningaasat sukkanerpaamik Inatsisartut ataatsimiittarfissaanut nutaamut atussagigut imaluunniit allanut kissaatigisanut eqqumiilluinnartunut inuiaqatigiinnullu iluaqusiinngilluinnartunut atorneqassasut. Aningaasat ileqqaartariaqarpugut pikkorinnerulerlulalu aningaasat sumut atornissaanut pilersarusiornissamut, aningaasaqarnikkut siuarsarnej ineriartornerlu pilersikkumallugit, ingerlatsinermut aningaasartuutit amerliartuinnartinnagit. Inuiaqatigiit aningaasarsiornerrannut iluaqutaanngilaq - ilikkartariaqarparput nunatsinni siunissamut ungasinnerusumut qiviartarnissarput pilersarusiorluarsinnaanerlu.

Aningaasarsiornerep siuariartornera annermik aalisarnerminngaanneerpoq. Demokraatiniit nuannaarutigaarput aalisarnej ingerlalluarmat, taamaakkaluartorli eqqumaffigisariaqarparput inuussutissarsiutinik allanik ineriartortitsisariaqaratta, aningaasarsiorfii amerlisarniarlugit. Aningaasaqarnikkut nukittunerulissaagut nunatullu qajannaannerulissaagut. Ukiut ingerlanerini takujuarnikkuarput - qanoq nangiarnartigisinnaanersoq, ataasiinnarmik annertuumik isaatitsiveqarnikkut, assersuutigalugu aalisakkat akii apparaangata - nunatta karsianut isertitat millisarput. Taamaammat pingaartorujussuuvoq inuussutissarsiutit allat siuarsarnissaat aningaasaqarnikkut kivitseqataanissaat siunertaralugu, tamannalu pimoorulluinnartariaqarparput.



Aamma suliniutit arlallit aallarterput suliffeqarfiit innuttaasullu atugaannut pitsanngorsaataasussat. Demokraatiniit neriutigaarput upperalugulu ingerlatseqatigiiffiit akileraarutaannik appaaneq taamatullu sulinermut ilanngaammik eqqussiniarneq pilersaarutaareersut Naalakkersuisut nutaat nangikkumaaraat.

Ingerlatseqatigiiffiit akileraarutaat allaqqaasiutigissavara; appartariaqarpoq unammilleruminartunngorlugu - suliffeqarfinnik ingerlatseqatigiiffinnillu nunatsinnut nooqqusisinnaangilagut akileraarutit taama qaffasitsigitillugit. Nunatsinni suliffeqarfiit pioreersut qaffasippallaarujussuurtumik ullumikkut akileraartarput. Akileraarut millineqarpat suliffeqarfiit aningaasaliinerulissapput aammalu amerlanerungaartut atorfinitsinneqarsinnaassapput. Tamatuma kingunerissavaa suliffissaaleqisut ikilinerat siuariartornerulerneq inerisaanerlu.

Sulinermut ilanngaatip eqqunnissaa eqqarsaatigalugu tamatuma kingunerissavaa amerlanerusunut akilersinnaalissasoq sulineq pisortanit pilersorneqarnermut naleqqiullugu. Qaqugumulluunniit akilersinnaanngisaannassaq pisortanit pilersorneqarneq, suliffeqarnermut naleqqiullugu - pisortat ikiorsiissutaat tamaallaat tuttariaqarput atorneqarlutillu ikiorneqarnissaminnut pisariaqartitsinerpaanut pisariaqartitsilluinnartunullu. Sulisinnaasut sulissapput - suliffissamullu naaggaaraanni kinguneqartariaqarpoq.

Aaqqissusseqqinnissat suli pisariaqarput. Demokraatinut pingaaruteqarpoq, aaqqissusseqqinnerit ingerlaqqinnissaat. Ernummatigissanngilarput qunuginagulu nuanniitsunik aalajangiisarnissarput - annernassagaluarpuunniit. Tamanna saperaanni tulluutinngilaaq akisussaaffiimmi tassani issiassalluni, naatsumik oqaatigalugu.

Demokraatiniit isumaqartuarpugut aningaasaqarnerput mianersuuttariaqaripput sukannersumillu aqullugu. Eqqarsaatiguarparput inuiaqatigiit aningaasarsiornerannut suna eqqortuunersoq, aaqqiissutillu sorliit, atasinnaanersut siunissaq ungasinnerusoq eqqarsaatigalugu. Naalakkersuisut nutaat aalajangeriigaat uagut isitsinni eqqarsartariaasitsinnilu kukkusooq tassaavoq Naalakkersuisut ataatsimik ilanerat. Aaliangerneq tamanna inuiaqatigiit



aningaarsiornarat eqqarsaatigalugu eqqortuliornerrunngilaq aamma piffissaq ungasinnerusoq isigalugu isumatusaarnerunngilaq. Iliuutsip uumap qanorpiaq akeqassanera pillugu Naalakkersuisunut naatsorsoqqunikuuara qilanaarivaralu akissutaasa tigusissaanut.

Aaliangiisartutut akisussaaffigaarput siunissami tunguinerup qularnaarnissaa. Iliuuseqarnissaq, sapiissuteqarnissaq piunassuseqarnissarlu pisariaqarluinnartutut Demokraatiniit isigivarput. Demokraatiniit piareersimavugut iliuuseqassalluta. Aamma neriuppugut partiit allat sapiissuseqarumaartut nunarput pillugu akisussaaffimmik tigusissallutik.

Taamatut oqaaseqarluta siunnersuut suliareqqitassanngorlugu Aningaasaqarnermut Akileraartarnermullu Ataatsimiititaliamut innersuupparput.